

**Neqinik eqqussinermi akitsuutit peerneqarnissaanik Naalakkersuisut peqquneqassasut
Inatsisartut aalajangiiffigisassaattut siunnersuut**
Inatsisartunut ilaasortamit Jens-Frederik Nielsenimit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap 3. november suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Asii Chemnitz Narup, Inuit Ataqtigiit
Inatsisartunut ilaasortaq Mariia Simonsen, Inuit Ataqtigiit
Inatsisartunut ilaasortaq Kuno Fencker, Siumut
Inatsisartunut ilaasortaq Lars Poulsen, Siumut
Inatsisartunut ilaasortaq Jens Napaattooq, Naleraq

UKA 2022-mi ulloq 12. oktober 2022 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Neqinik eqqussuinermermi akitsuutit peerneqarnissaat pillugu siunnersuummik saqqummius-sinissamat Naalakkersuisut siunnersuutikkut peqquneqarput. Neqit akiisa appartinneqarnissaat siunnersuutip siunertarigaa siunnersuuteqartup paasissutissiissutigaa, tamannalu minnerunngitsumik innuttaasunut isertitakinnernut iluaqutaassaaq.

2. Siunnersuutip Inatsisartunit siullermeerneqarnera

Aalajangiiffigisassatut siunnersuut taperserpeqarlunilu akerlerineqarpoq. Minnerunngitsumik siunnersuutip piviusunngortinneqarneratigut iluanaarutissaagaluanit annaasat aningaasaler-sornissaat kiisalu nunatsinni akitsuutinik ilusilersuineq siunnersuummik siullermeerinninnermi oqallisigineqarput.

3. Ataatsimiititaliap siunnersuummik suliarinninnera

Ulluinnarni nioqqutissanut aningaasartuutit appartinnissaannut partiit tamarmiusut piumas-

suseqartut aammalu innuttaasut ilaqutariillu isertitakinnerit inuuniarnikkut atugassaasa pitsanngortinneqarnissaat nalinginnaasumik isumaqatigiissutigineqartoq ataatsimiititaliamit maluginiarneqarpoq. Nunarsuarmi aningaasat naleerukkiartornerat ulluinnarni nioqqutissat akiisa malunnaatilmik qaffannerannik nassataqarpoq, tamannalu minnerunngitsunik innuttaasunik taakkuninnga eqquivoq.

Aningaasalersuineq

Siunnersuutip piviusunngortinneqarneratigut iluanaarutissaagaluanit annaasat aningaasalersornissaat siunnersuummik siullermeerinninnermi immikkut oqallisigineqarput. Neqinut akitsuutinit 2021-mi isertitat 18,3 mio. kr.-iusut siunnersuuteqartup paasissutissiissutigaa. Kiisalu neqinut akitsuutinit isertitassat 2023-mi aningaasanut inatsisissatut siunnersuummi 15,5 mio. kr.-iusussatut missingerneqartut Aningaasaqarnermut Naligiissitaanermullu Naalackersuisup akissuteqaammimi paasissutissiissutigaa. Ataatsimiititaliap paasinninnera malillugu siunnersuutip piviusunngortinneqarnerata kingunerisassai partiinit akuersaarneqarput aammalu siunnersuutip piviusunngortinneqarnerata pisariaqalersitaanik aningaasaqarnikkut pingaarner-siulluni tulleriarisariaqarneq paasinnittumik pissuseqarfigineqarpoq. Isertitassaagaluit annaasassat taakku allatigut pissarsiarineqarnissaat nalinginnaasumik isumaqatigiissutigineqarpoq, aaqqiissutissamillu nassaarniarnissami suleqataarusussuseqarneq partiit akornanni oqaatigineqarpoq.

Siunnersuutip nassatarisaanik isertitassaagaluanik annaasaqarnissamut atatillugu aningaasalersuutaasinnaasunik marlunnik siunnersuuteqartoq saqqummiussivoq.

1. Akiliisitseriaatsimik Ilangaassivimmik atuutilersitsinissaq, ukiumut 30 mio. kr.-inik iluanaaruteqarnissamik nassataqartussa.
2. Aningaasanut inatsimmi ingerlatsinermut ilassutitullu aningaasaliissutini tamani nalinginnaasumik sipaaruteqarneq, ukiumut 56 mio. kr.-inik aningaasartuutikinneru-nermik nassaqartussa.

Periarfissat taakku marluk tamakkiisuusutut isigineqanngillat, tassa isummernissamut tungavissiani isumaqatigiinniutigineqarsinnaasoq siunnersuuteqartup oqaatigimmagu. Taamaalillunilu aningaasalersuinissamut periarfissat allat siunnersuuteqartumit ammaffigineqarput. Tassunga atatillugu ataatsimiititaliamit oqaatigineqassaaq Akiliisarfik Ilangaassivik pillugu Inatsisartut inatsisaata atorunnaarsinneqarnera pillugu Inatsisartut inatsisaata (UPA 2022/17) akuerineqarneratigut akiliisitseriaaseq atorunnaarsinneqarmat.

Kiisalu minnerunngitsumik akinut apparsaatnik allanik iliuuseqannginnermi akinut apparsaatitut ungasinngitsukkut iliuutsit utaqqimaqqaarumallugit aalajangiiffigisassatut siunnersuutip siullermeerneqarneranut akissuteqaammimi Aningaasaqarnermut Naligiissitaa-nermullu Naalackersuisup oqaatigisaa ataatsimiititaliamit maluginiarneqarpoq. Siunnersuutilli piviusunngortinneqarnerani aningaasalersuutaasinnaasunut tunngatillugu suleqataarusussuse-qarneq Naalackersuisumit oqaatigineqarpoq, taamaattumillu siunnersuut akuerineqassanersoq

itigartinneqassanersorluunniit inassuteqarani. Iluanaarutissaagaluanik annaasanut tunngatillugu ataatsimiititaliamit naatsorsuutigineqarpoq Naalakkersuisut siunnersuut 2023-mi aningaasanut inatsisissaq pillugu isumaqatigiinniarnernut nassassagaat aammalu siunnersuutip piviusunngortinneqarnerani aningaasatigut kingunerisassaasa aningaasalersornissaannut pilersaarummik suliaqassasut.

Akinik appaaneq

Ataatsimiititaliamit maluginiarneqarpoq ulluinnarni nioqqutissat akiisa qaffasissut appartinnissaannut iliuutsit suut naleqqunnerpaanersut imaanngimmat partiinit isumaqatigiissutigineqartoq. Akitsuutinik allanngineq pillugu oqallinnerni uteqqianneqartoq tassaavoq ulluinnarni nioqqutissat eqqussukat najukkameersulluunniit akitsuutaasa appartinneqarnissaat inuiaqatigiinnut kalaallinut pitsaanerunersoq aammalu akitsuutinik appaanermi nioqqutissat suliareqqaarneqarsimasut suliareqqaarneqanngitsulluunniit siunniunneqassanersut.

Ulluinnarni nioqqutissat akitsuutaannik appartitsinissap oqallisigineqarnerani akitsuutinik maanna ilusilersuinerup naammagisimaarneqannginnera oqaatigineqartartoq ataatsimiititaliamit maluginiarneqarpoq. Ilaatigut najukkami tunisassiornermut aammalu imminut pilersornissap annertunerulernissaanut iluaqutissiinerunissaq kissaatigineqartoq oqaatigineqarpoq. Tassunga nangissutitut ataatsimiititaliamit maluginiarneqarpoq immikkut appaanernut taarsiullugu akitsuutinik ilusiliisimanerup tamakkiisumik oqaluuserineqarnissaa kissaatigineqartoq.

Kiisalu akitsuutinik nalinginnaasumik ilusilersuisimanermut tunngatillugu avatangiisit annertunerusumik eqqumaffigineqarnissaat partiinit ataasiakkaanit kissaatigineqartoq ataatsimiititaliamit maluginiarneqarpoq. Tamatumani pineqartoq tassaavoq akitsuutinik ilusilersuinerumik siunissami allannguinissami ilaatigut nunarsuarmi neqinik tunisassiornerup avatangiisinut kingunerisaasa isiginiarneqarnissaat. Ataatsimiititaliamilli maluginiarneqarpoq Ukrainemi sorsunnerup kingunerisaanik nunarsuarmi pissutsit, tamatumalu akit qaffannerannik nassataat, partiit ilaannit imaannaanngitsutut isigineqartut. Taamaattumillu innuttaasunut iluaqutissiinissaq ulluinnarnilu nioqqutissat akiinik appaanissaq piumassuseqarfigineqarpoq.

Naaperiaassutitut allannguutissatut siunnersuuteqarneq

Siunnersuutip piviusunngortinneqarnerata NEQI A/S-imut qanoq sunniuteqarsinnaanera aammalu savat savaaqallu neqaannik najukkami tunisassiornermut tunisaqarnermullu siunnersuutip piviusunngortinneqarnerata kingunerluutigisinnaasai ataatsimiititaliamit siunnersuummik suliarinninnermi isumakuluutigineqarput. Taamatut isumakuluuteqarneq aallaavigalugu naaperiaanermik suliaqartoqarpoq, tamatumaniilu ataatsimiititaliamut ilaasortat isumaqatigiissuteqarput.

Naaperiaanermi neqit eqqussorneqartut tamarmiusut akitsuutaasa peerneqarnissaannik

siunnersuutip taasissutissartaa savat savaaqqallu neqaat minillugit neqit eqqussorneqartut tamarmiusut akitsuutaasa peerneqarnissaannut allanngortinneqarpoq. Taamaaliornikkut neqinik tunisassiat akiinik appaanissamik kissaateqarneq siunnersuutikkut akuersaarneqarpoq, tamatumalu peqatigisaanik savat savaaqqallu neqaannik najukkami tunisassiorneq iluaqu-tissinneqarluni.

4. Siunnersuutip aningaasaqarnikkut kingunerisassai

Aalajangiiffigisassatut siunnersuutip piviusunngortinneqarnerata aningaasaqarnikkut allaffis-sornikkullu kingunerisassai siunnersuummut tunngavilersuummi allaaserineqassasut Inatsisar-tut suleriaasianni § 33, imm. 1-imi allassimavoq. Tamanna naapertorlugu siunnersuutip piviu-sunngortinnerani aningaasatigut kingunerisassat siunnersuummi nalunaarneqartut ataatsimii-titaliamit maluginiarneqarpoq. Nunatta karsiata naatsorsuutai naapertorlugit neqinut akit-suutinit 2021-mi isertitat 18,3 mio. kr.-it missaanniittut siunnersuuteqartup paasissutissiis-utigaa. Isertitali taakku ilaat timmissanik aalajangiiffigisassatut siunnersuummut matu-munnga ilaangitsunik tunisassiornermeernissaat ilimanarmat nangaanartoqartinneqarpoq.

Namminersorlutik inuussutissarsiuteqartunut aningaasaqarnikkut allaffissornikkullu kingune-risassani allassimavoq suliffeqarfiit, tassungalu ilanngullugit pisiniarfiit, neqinik tunisassiaati-mik akiinik appaasinnaassasut. Tamatuma saniatigut cafét suliffeqarfiillu sulisunut nerisar-feqartut neqinik pisiortornerminni sipaaruteqassapput. Siunnersuutip piviusunngortinne-qarnerata nassatarisaanik savaaqqat neqaat najukkami tunisassiarineqartut pinnagit savaaqqat neqaannik tikisitanik atuisartut toqqaarusunnerusinnaanerata siunnersuuteqartup paasissutis-siissutigaa. Pitsaassuseq eqqarsaatigalugu taamaattoqarsinnaanerata aarleqqutiginnissaa annikitsuararsuusutut nalilerneqarpoq.

Innuttaasunut aningaasaqarnikkut allaffissornikkullu kingunerisassani allassimavoq siunnersuutip piviusunngortinneqarnera innuttaasunut iluaqutaassasoq, tassa innuttaasut neqitortartut neqinik tunisassianik pisinerminni aningaasanik sipaaruteqassammata. Kiisalu neriniartarfinni imaluunniit caféni nerinermi akit appassapput.


5. Ataatsimiititaliap inassuteqaatai

Tamanna tunngavigalugu ataatsimiititaliaq isumaqatigiittoq **allannguutissatut siunnersuum-mik** imaattumik saqqummiussivoq:


Savat savaaqqallu neqaat minillugit neqinik eqqussuinermi akitsuutit peerneqar-nissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

Tamanna tunngavigalugu ataatsimiititaliap isumaqatigiittup siunnersuut itigartinneqassasoq inassutigaat ammalu ataatsimiititaliap allannguutissatut siunnersuutaa akuerineqassasoq.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Hans Peter Poulsen
Siulittaasoq




Jens-Frederik Nielsen
Siulittaasup tullia




Lars Poulsen



Mariia Simonsen



Kuno Fencker



Jens Napaattoq



Asii Chemnitz Narup